

PUL-KREDIT SIYOSATI SHARHI


Qisqa tavsif

2026-yil I chorak


Iqtisodiy faollik va yalpi talab

2026-yilning I choragida iqtisodiy faollik yanada jadallashib, yalpi talab omillari iqtisodiy o'sishni qo'llab-quvvatlashda davom etdi. Investitsiyalar hajmining ortishi, xizmatlar, qurilish va savdo sohalaridagi o'sish, shuningdek ichki talabning yuqori shakllanishi iqtisodiy o'sish sur'atlarining tezlashishiga xizmat qildi.

YIMning real o'sish sur'atlari prognozi, foizda



Shaxsiy iste'molning real o'sish sur'atlari, foizda




Manba: Markaziy bank hisob-kitoblari.

Inflyatsiya va inflyatsion kutilmalar

I chorak davomida inflyatsiya pasayish tendensiyasini davom ettirdi. 2026-yil mart oyida **yillik inflyatsiya 7,1 foizgacha** sekinlashib, prognoz doirasida shakllandi. Inflyatsiyaning pasayishi asosan ayrim tovarlar bo'yicha o'tgan yilgi yuqori baza ta'sirining chiqib ketishi bilan izohlanadi. **Bazaviy inflyatsiya** yillik hisobda **5,7 foizni** tashkil etdi. Shu bilan birga, so'nggi oylarda inflyatsiyaning keng qamrovli pasayishi sekinlashib, iqtisodiyotda inflyatsion bosimlar saqlanib qolayotganini ko'rsatmoqda.


Umumiy va bazaviy inflyatsiyaning yillik o'zgarish dinamikasi, foizda




Manba: Markaziy bank hisob-kitoblari.

Aholi va tadbirkorlik subyektlarining inflyatsion kutilmalari mart oyida pasayishda davom etgan bo'lsa-da, ular hali ham prognoz ko'rsatkichlaridan yuqori shakllanmoqda. Joriy inflyatsion tendensiyalar qisqa muddatda talab omillarining ta'siri saqlanib qolayotganini ko'rsatmoqda.

Kelgusi 12 oylik inflyatsion kutilmalar va umumiy inflyatsiya dinamikalari, foizda



Inflyatsion kutilmalar va umumiy inflyatsiya orasidagi tafovut, foizda




Manba: Markaziy bank hisob-kitoblari.

Tashqi iqtisodiy sharoitlar

2026-yilning I choragida geosiyosiy keskinliklarning kuchayishi fonida tashqi iqtisodiy noaniqliklar ortdi. Jahon bozorlarida energiya resurslari va oziq-ovqat narxlarining oshishi, shuningdek logistika va tashish xarajatlarning ko'payishi kelgusida import kanallari orqali ichki inflyatsion bosimlarni kuchaytirishi mumkin.

Shu bilan birga, oltin narxining yuqori darajada saqlanishi, eksport tushumlari va pul o'tkazmalarining barqaror o'sishi hamda asosiy savdo hamkor davlatlar valyutalarining mustahkamlanishi ichki valyuta bozorida xorijiy valyuta taklifini qo'llab-quvvatlashda davom etdi. Ushbu omillar valyuta bozorida nisbatan barqaror sharoitlarning shakllanishiga xizmat qildi.

Asosiy hamkor davlatlardagi asosiy stavka va inflyatsiya dinamikasi, foizda




Manba: Markaziy bank hisob-kitoblari.

Pul-kredit sharoitlari va siyosat istiqboli

Inflyatsiyani o'rta muddatda 5 foizlik maqsadli darajaga yaqinlashtirish maqsadida pul-kredit sharoitlari yetarli darajada qat'iy saqlanmoqda. Ijobiy real foiz stavkalari milliy valyutadagi jamg'armalarni rag'batlantirib, kreditlash sur'atlarining muvozanatli shakllanishiga xizmat qilmoqda.

Shu bilan birga, investitsion faollik va iste'mol talabi kabi yuqori yalpi talab omillari iqtisodiyotda inflyatsion bosimlarni saqlab qolmoqda. Mazkur sharoitlarda narxlar barqarorligini ta'minlash uchun yetarli darajada qat'iy pul-kredit sharoitlarini saqlab qolish muhim ahamiyat kasb etadi.

UZONIA ko'rsatkichining kunlik dinamikasi, foizda



Manba: Markaziy bank hisob-kitoblari.

O'rta muddatli makroiqtisodiy prognozlar

Yangilangan **prognozlarga ko'ra**, 2026-yil yakuniga kelib **inflyatsiya 6,5 foiz** atrofida, **iqtisodiy o'sish esa 7–7,5 foiz** darajasida shakllanishi kutilmoqda.

Markaziy bank kelgusida ham inflyatsiya dinamikasi, inflyatsion kutilmalar, yalpi talab sharoitlari, almashuv kursi tendensiyalari hamda tashqi iqtisodiy xatarlarni diqqat bilan kuzatib boradi. Pul-kredit siyosati, makroiqtisodiy barqarorlikni ta'minlash hamda aholining xarid qobiliyatini saqlashga qaratilgan bo'lib qoladi.

To'liq sharh bilan quyidagi [havola](#) orqali tanishishingiz mumkin.